

# Il pasler da chasa e ses parents

L'utschè il pli preschent en la vita da mintgadi da l'uman

■ Da tut ils vertebrats che vivan sin la terra dispona la classa dals utschels dal pli grond dumber da spezias (bundant 10 000). Cun radund 5700 spezias furman ils Passeriformes il pli grond urden entaifer la classa dals utschels. Quest urden è talmain dominant ch'ins subsumescha savens tut ils ulteriurs urden (a moda nunschientifica) sut il term **Nonpasseriformes**. Entaifer ils Passeriformes datti trais suturdens. Sper la furma basala che cumpara en la Nova Zelanda èn quai ils «utschels che sbragian» (Tyranni) ed ils «utschels che chantan», pia ils utschels chantadurs (Passeri). Tar ils Tyranni, che vivan en regiuns tropicas e subtropicas, è il nuf da la giar-giatta costruì a moda pli simpla; ils utschels chantadurs percenter èn abels da producir in grond dumber da tuns.

Cun bundant 90 famiglias e ca. 4000 spezias furman ils utschels chantadurs il pli vast taxon entaifer la classa dals utschels. La sistematica interna dals utschels chantadurs è contestada fin oz. Sper las famiglias basals ed ils corvids sa cumponan ils utschels chantadurs dals Passerida che represchentan la gruppa



per lunschor la pli gronda. A quella appartegnan famiglias d'utschels da statura pli pitschna sco ils fringhels, ils masets, ils turschs e.a. Cun excepziun dal pirolo, dals pitgaspinas e da la famiglia dals corvids tutgan tut ils utschels chantadurs da l'Europa Centrala tar ils Passerida.

Entaifer ils utschels chantadurs furman las famiglias parentadas cun las fustgettas (Sylviioidea) e surtut las famiglias parentadas cun ils paslers (Passeroidea) gruppas pli grondas. Ed entaifer quest'ultima è lura er da chattar la famiglia dals paslers (Passeridae). I dat en egl ch'il num latin «passer», dal qual deriva er il num rumantsch pasler, cumpara a moda fitg prominente entaifer la sistematica dals utschels (Passeriformes > Passeri > Passerida > Passeroidea > Passeridae > Passer). Quai renvescha gia a la vasta derasaziun da quest utschè ed a sia ferma preschientscha – sco suondacultura – en l'ambient da l'uman.

## Tratgs characteristics

La famiglia dals paslers dumbra 11 genres che cumpiglian en tut 48 spezias. Il territori da derasaziun furma surtut l'Africa, en pli vasts territoris da l'Eurasia. Intginas spezias èn er arrivadas cun l'uman sin auters continents (surtut il pasler da chasa).

## Cumparsa

Ils paslers èn utschels chantadurs plitost pitschens; per ordinari cuntanschan els



Ils paslers èn abels da s'adattar perfetgamain a l'ambient dals umans.

FOTO PD

ina lunghezza dal corp tranter 10 e 20 centimeters. L'utschè ha ina furma compacta; il chau è grond en relaziun cun la grondezza dal corp ed il pichel è curt e ferm.

Tar la gronda part da las spezias èn las plimas da color brina, grischa u brin-cot-schna. Be in pèr paucas spezias han er partidas da color melna u alva. Intginas spezias da paslers èn segnadas en lur cumparsa d'in ferm dimorfissem sexual. Ils pitschens sumeglian mintgamai la femella creschida.

Paslers creschids percurran ina giada ad onn ina paliranza cumpletta. Quella cumenza suenter la fasa da cuar. Utschels giuvens midan lur plimas en il decurs da l'emprim mais suenter esser capabels da sglar.

## Spazi vital

Sco spazi da viver prefereschon ils paslers regiuns avertas, sitgas u semi-aridas. Els cumparan però er en savannas, en la bostaglia ed en deserts; en pli en gauds betg memia spess, sin territoris agriculs sco er en u en vischinanza da zonas abitadas. Intginas spezias, sco per exempel il pasler da chasa, vivan fitg datiers da l'uman e cumparan er en il center da citads grondas.

La gronda part dals paslers gnivan en colonias luccas, be paucas spezias fan ils gniesu dapersai. Talas colonias pon esser fitg grondas: En il Maroc han ins observà ils onns 1950 ina colonia da gnivaziun dal pasler da prada che cumpigliava radund 125 000 gniesu sin 60 hectaras. En ina singula planta sa chattavan fin a

50 gniesu. Talas valurs extremas furman però l'excepziun.

## Moda da viver

Paslers vivan per ordinari a moda monogama; intginas spezias mainan ina relaziun ch'exista uschè ditg sco che omadus partenaris èn en vita. Independentmain dal lieu da gnivaziun sa tracti praticamain adina d'in gnieu en furma da cula cun entrada laterala. Il gnieu vegn costruì a moda fitg pragmatica; en la part exteriura penda il material per far il gnieu per ordinari simplamain nauagiu. Intginas spezias sa servan er da gniesu d'altres spezias d'utschels che na vegnan betg pli duvrads. Omadus geniturs cuan e sa partecipeschan comunablamain a la tgira dals pitschens.

Entaifer lur colonias enconuschan ils paslers ina clera ierarchia. Quella vegn fatga dependenta da la grondezza da la coluraziun dal pèz: pli grond e pli stgir ch'è quest «bistet» e pli aut ch'è il rang da l'utschè entaifer sia colonia.

Ils paslers enconuschan savens in'interessanta furma da tgirar lur plimas, numnadamain uschenumnads bogns da sablun: Ils utschels sesan en ina pitschna foppa da sablun sitg, smatgan lur corp per terra e muventan quel svelti vi e nà. I sa tracta d'ina mesira d'igiencia cun l'intent da liberar las plimas da parasits sco plugs u chariels.

## Nutrimet

Ils paslers sa nutreschan surtut a moda vegetala, per exempel da sems; els na refusan però er betg pitschens insects. Tschertas spezias da paslers èn sa spezializadas sin vanzadiras ch'els chattan en vischinanza da l'uman. Ils giuvens en il gnieu vegnan adina nutrids cun material animalic (pitschens insects e lur larvas, l'uschenumnà plancton da prà).

## Las spezias indigenas

Las duas spezias da paslers las pli derasadas en l'Europa Centrala èn il pasler da chasa ed il pasler da prada. En regiuns alpinas cumpara ultra da quai il squinz u pasler alpin ed en regiuns dal sid, da caracter mediterran, il pasler talian e – pli baud – il pasler da grip.

## Pasler da chasa

Tgi n'als enconuscha betg, quests cumpogns viscus! Il clom schilpegiant dal pasler da chasa (*Passer domesticus*) è enconuscent a mintgin, els giran tras noss ierts, sesan sin ils tetgs da las chasas e fan lur gniesu dapertut nua ch'els chattan in lieu. Il pasler da chasa ha ina color nunschientifica e sa nutrescha da sems e d'in-

sects. El è s'adattà cun success a l'ambient midà da l'uman e sa chatscha gugent enavant sin l'aissa da pavel. El vegn savens en ierts tar lieus cun aua per baiver u per far in bogno. Qua e là al pon ins observar fashond in bogno da pulvra.

Caracteristicas: Cun sia vusch fa el schilp – schilp. Il sgol è guliv e svelti. Il moviment per terra è caracterisà da sigls, mintgatant cun alas che pendan.

Il pasler da chasa è l'utschè il pli preschent en la vita da mintgadi dal carstgaun. Sco nagin'altre spezia d'utschels è el s'endisà optimalmain a la vischinanza dals umans. Il nutriment abundant en las aglomeraziuns urbanas permetta als paslers da chasa da trair si cun success lur pitschens. Cun 900 000 pèrs che cuan tutgan els tar ils utschels cuaders ils pli numerus en Svizra.

Quest pasler era oriundamain be derasà da l'Europa a l'India ed ha girà l'entier mund cun l'uman. Grazia a sia capacitad da s'adattar e d'emprender po il pasler da chasa s'acclimatisar tant en l'environ sibiric sco er en il clima tropic da l'America dal Sid.

## Pasler da prada

Il pasler da prada (*Passer montanus*) è in stretg parent dal pasler da chasa omnipreschent. Il pasler da prada è però main derasà en lieus abitads ch'il pasler da chasa ch'è in pau pli grond e sa disparta pli gugent. Il pasler da prada abitescha en cuntradas plitost ruralas. El preferescha la cuntrada averta cun plantas, saivs vivas ed ierts da fritga. Sch'ins observa mo superficialmain al sbaglian ins gugent cun il pasler da chasa masculin. El sa differenziescha dentant pervi da sia verscha da color marun, il flatg nair sin la vista ed il tachel pli pitschen sin la gula. Mastgels e femellas èn colorads tuttina.

Il pasler da prada sa nutrescha cunzunt da sems, durant il temp da cuar er d'insects. El fa ses gnieu costruì svelti en plantas vidas, foras en mirs ed autras tannas ed accepta era gugent chasettas da gnivar. Ses dumber è sa diminui en bleras regiuns pervi da l'utilisaziun intensiva dal terren agricul. Il pasler da prada è in utschè social; el è però cleramain main collià cun l'uman ch'il pasler da chasa. Ins al chatta en regiuns ruralas da l'entira Europa e da vastas parts da l'Asia. En Svizra è el derasà en il Giura, en la Svizra Bassa ed al sid da la Svizra fin a var 800 meters sur mar.

Caracteristicas: La vusch è pli auta che quella dal pasler da chasa e pronunzia in tschup, tschup, tsip; sch'el sgola: tjec – ttec – ttec. Il sgol è guliv, qua e là cun undas. Il moviment per terra tipic furman sigls.

## Pasler alpin

Entaifer ils Passeridae vegnan ils paslers alpini (*Montifringilla*) manads sco agen gener. Sco il cuacotschna da chasa, la brunella da muntogna, il pitgacrap u il pivet da muntogna tutga er il squinz u pasler alpin (*Montifringilla nivalis*) tar las spezias d'utschels che vivan sur il cunfin dal gaud. Là pon ins observar els il mez onn da stad. Els cuan en pastgiras ed en sfessas dal spelm fin ad in'atezza da 2600 meters.

Schizunt cura ch'i regia ina criva aura d'environ na guntgescha el però strusch en autezzas situadas pli a bass che 1500 m. Gugent profitescha el dals indrizs turistic e restaurants da muntogna; là vegn el attratg da vanzadiras da spaisas e po d'averar vaira domestic. Adina dapli sa sviluppà questa spezia da pasler ad in animal che suonda la cultura.

Il temp da cuar inizescha il mastgel cun sgols en furma da spirala accumpagnads d'in chant intensiv. En egl dattan surtut las alas avertas da color alva. Ad ina piazza da gnivar adattada renda il mastgel attent cun sa schluitar en la tauna, chantar a l'intern e guardar ora.

## Pasler talian

Tar il pasler talian (*Passer italiae*) sa tracti d'ina populaziun da paslers cun bleras sumeglientschas tant cun il pasler da chasa (*Passer domesticus*) sco er cun il *Passer hispaniolensis*. El viva surtut en l'Italia sco er a Corsica e Creta, e quai per ordinari en territoris nua che las duas autras spezias parentadas na cumparan betg. Il status taxonomic dal pasler talian è ordvart contestà; per part vegn el considerà sco atgna spezia, per part sco sutspezia d'ina da las duas spezias numnadas.

En Svizra cumpara il pasler talian en il Tessin ed en il Grischun dal Sid. Localmain al pon ins er scuntrar en il Vallais. En l'artg alpin, nua ch'il cunfin dals areals dal pasler da chasa e dal pasler talian fruntan in sin l'auter exista ina zona d'interferenza, entaifer la quala cumparan er ibrids fritgaivels.

En la Svizra dal Sid vali pia la paina da contemplar pli precis ils paslers e da far atenziun sin la coluraziun da la verscha che tanscha da grisch fin brin da chastogna.

## Pasler da grip

Il pasler da grip (*Petronia petronia*) abitescha en regiuns suleglivas, crappusas e sitgas da la zona mediterranea. El sa distingua d'auters paslers tras las strivlas dal chau marcantas e tras il flatg da la gula mellen-citrona.

Quel è pli u main visibel, tut tenor la disposiziun da l'utschè – il meglier durant il temp da gnivaziun. Intgins auturs mainan il pasler da grip e ses proxims parents sco agen gener (*Petronia*); las differenzas geneticas envers ils paslers èn però minimas, uschia ch'els vegnan per part er attribuidas al gener *Passer*. Il pasler da grip gniva en l'Europa dal Sid en la steppa ed en la muntogna en cuntradas sitgas e chaudas. El viva da cumpagnia ed è – ordadifer il temp da cuar – savens da vesair en trieps.

Fin la mesadad dal 20avel tschientaner è il pasler da grip er stà da chasa en parts da l'Europa Centrala (eventualmain er en Svizra al nord da las Alps). Da quel temp gnivava el en grippa sulegliva, savens circumdada da gauds betg memia spess, u vi da ruinas. Er d'environ restava el a la piazza da cuar u en vischinanza da quella.



Il mastgel dal pasler da chasa (maletg) ha ina coluraziun bundant pli ritga da cuntrasts che la femella.

FOTO KLICKER / PIXELIO

La presentaziun:  
Dossier «Paslers».

Dapli infurmaziun:  
chatta.ch/?hiid=2310  
www.chattà.ch